

## ■ CONVIVENZA

# Crap per crap per dapli punts

DA BETTINA CADOTSCH\*

In da mes nevs ha dus onns e l'auter ha prest quatter onns. Per els na datti per il mument nagut pli bel che da bajegiar punts cun tscheppa e da giugar cun autos che traversan quellas construcziuns. Era sch'els èn anc fitg giuvens e giogan simplamain tenor lur instinct san els ch'i dat impediments ch'ins po sviar cun punts.

Far punts – en quest sector essan nus Grischuns experts. Ils inschigners che han costruì las punts imposantas da la Viafier retica tutgan per exempel tar ils gronds pioniers da las punts. Passa 600 punts èn vegnidas erigidas per traversar flums e chavorgias en noss chantun. Tranter quellas datti varsaquantas capodovras. Da menziunar fiss qua per exempel il viaduct da la Landwasser a Filisur che tutga perfin tar il Patrimoni mundial da l'Unesco.

Nus Grischuns essan era buns sch'i va per far punts tranter ils linguatgs. Quai segir era perquai che nus discurren en noss chantun trais da las quatter linguas svizras. Nus Rumantschs pudain perfin far punts pli grondas a las linguas latinas sco per exempel il spagnol ed il franzos.

Ins pudess pensar che «construir punts» ans



vegn mess en tgina. Ma era sche nus traversain diversas punts avain nus – sche nus essan sincers cun nus sezs – savens fadia da crear ellas en noss mintgadi. Cun quai na manegel jau betg las punts fisicas, mabain quellas tranter ils carstgauns.

Bler memia savens essan nus umans mo in tschep per nus sezs. Nus avain noss'atgna vita ch'ans è logicamain il pli manaivel, noss agens problems, las atgnas dumondas e las atgnas finamiras. Nus giain nossas vias savens senza guardar a dretga u a sanestra per empruvar da vesair tge che capita enturn nus.

Quel che construescha punts, quel porta chargias dad insatgi, va encunter ad insatgi, surmunta insatge, collia insatge, di in bun pled ad insatgi ed è er abel da perdunar. Gist quai che pertutga il perdunar sun jau da l'opiniun ch'i fa basegn da sa megliar. Quel che na perduna betg ad auters serra a sasez ina

via ch'el dovra forse sez in bel di. Conflicts datti numnadamain danvanz, nua ch'i dat umans.

Tenor mai èsi er in problem che nus carstgauns avain savens il sentiment che nossas atgnas normas, vistas e perspectivas sajan adina las dretgas. Nus avessan pli savens d'empruvar da star salda, d'empruvar da chapir auters e dad ir encunter ad auters. Sulettamain uschia vegn ins davent da sia via e cumenza a construir insatge tar insatgi u insatge auter.

Qua e là ma giavischass jau ch'i fiss uschè simpel da bajegiar ina punt sco quai ch'igl è il cas tar mes nevs. Per surmuntar las punts dovri però savens curaschi, effort e cunzunt la veglia. E nagina punt n'è sco l'autra, perquai che mintgina ha autras circumstances ed auters impediments. Sche nus prendain però a cor che nus Grischuns essan atgnamain experts da construir punts pudessan nus per franc laschar daventar questa fermezza anc dapli nossa atgna identitad.

\* Bettina Cadotsch è creschida si a Savognin. Ella studegia Multimedia Production a la Scola auta spezializada dal Grischun a Cuira e lavura tar Radio Südschweiz e «suedostschweiz.ch».

La convivenza da las linguas e culturas en il Grischun – quai è il tema da las columnas che cumparan sut il titel «Convivenza» e che vegnan publicadas mintga glindesdi en la «Südschweiz» ed en La Quotidiana.